



宋詩小集統目

周弼端平詩雋四卷 一百九十八首

胡仲參竹莊小稿一卷 七十六首

趙汝鐸野谷詩藁六卷 二百八十二首

李龔剪綃集二卷 集唐句一百二十首

李龔梅花衲一卷 集唐宋句二百二十二首

張弋秋江煙草一卷 四十三首

杜旃癖齋小集一卷 二十首

高九萬菊澗小集一卷 一百八首

趙崇錦鷗渚微吟一卷 四十八首



張鑒之東齋小集一卷 五十二首

許棐梅屋稿一卷 一百一十二首


許棐融春小綴一卷 二十六首 附雜著十篇

斯植采芝集一卷 今九首

斯植采芝續集一卷 五十八首

汶陽端平詩雋

汶陽周伯弼與予同庚生同寓里相與往來論詩三十餘年嘗手刊端平集十二卷行于世伯弼十七八時即博聞強記侍乃翁晉僊已好吟洎長而四十年間官游吳楚江漢足跡所到所作於七國兩漢三國六朝隋唐之體靡不該備聲騰名振江湖人皆爭先求市但卷帙中有晚學未能曉者稍多予恐有不行之弊茲於古體歌詩五言律七言律并五七言絕句摘其坦然者兼集外所得者近二百首目曰端平詩雋俾



萬人海中續芸陳君書塾入梓流行庶使同好
者便於看誦吾伯弼平生心不下人今隔九原
聞予此選必不以予為謬寶祐丁巳冬至日荷
澤李龔和父述

臨安府棚北大街陳解元書籍鋪印行

汶陽端平詩雋卷第一

汶陽周

弼

伯弼詩

荷澤李

龔

和父選

古體歌詩

黃鶴樓歌

城上危樓高縹緲城下澄江復相繞有時漾影
入中流俯看游魚仰飛鳥近樓多少未行舟滿
江落花灑汀洲人同江狎不怕浪登樓對酒彈
箜篌大別山頭白雲起金口渡邊雨如洗半鈎
新月上孤城還照高樓與江水晴江依舊瀉潯

陽黃鶴無由歸故鄉一聲玉笛起何處燕撲闌
干花影長

韜光庵

谷鳥與我言怨殺白太傅借問何以然携却山
僧去山僧未去時前盤一尾蛇後踞一頭虎吸
雲嘯風遶窓戶山僧已去了鶴來踏翻藤猿到
拗折樹亂篠枯柴塞行路抑將廬干嵩高之陽
温洛之許諸天散花復呵護抑將慕羶逐臭亡
菟喪鳧委枯骸於北邙之狐兔荒臺兮尚存破
屋兮如故惟有山僧不知處世間萬事誰始終

極目寒江起煙霧

牡丹

江南牡丹凡有幾德安打頭歛為二金陵舊物
間有之池陽吳郡皆居次地近京畿種偏好鄂
城栽接不草草春土篩泥繞畫欄石甃方壇淨
如掃當頭第一帶鞞紅膩紫嬌黃別作叢盤盃
擎出最迎日碧玉萬片藏春風寶葉絲絲帶縷
金錦斑酒暈間攢心翻騰梔茜亂朱粉樣各數
名分淺深低樹猶高五六尺花重剛枝反無力
迥出層陰轉耐看始悟年深有真色晚添細雪

來相簇露醒香菟冷方浴倚柱黃昏眼倍明頻
覺夜闌須秉燭洛水芳林應更多不禁飛雨洗
銅駝酥煎送酒有人在草沒故園無柰何莫對
餘春起嘆嗟最難保守是繁華君看南渡百年
內看到子孫能幾家

戴式之垂訪村居

故人手持一緘書扁舟清晨造我廬為問舟從
何方來欲應未應先長吁長安平旦朱門開曳
裾鞞履喧春雷獨有詩人貧難售朔雪寒風常
滿袖孤館青燈不自聊短帽鶉衣競相就獬豸

我冠豈無事不觸姦邪觸詩士雖當聖世尚寬
容滔滔寧免言為諱軒瑟齊竿本難遇長編巨
軸添憂慮松菊荒蕪歸計遲欲向何門誦佳句
君不見古者防川不禁口里諺村謠無不有美
刺箴規三百篇刪取皆經聖人手漢魏著述充
層雲采擷花草香紛紛其間國政最親切世許
少陵能愛君交衢謗木求胥誨盛若勛華猶不
改風雅遺音儻尚存篇篇適鐸皆應採小人幾
度邪侵正何嘗斷隔無歌詠風雨蕭蕭雞自鳴
誰顧寒莎響蛙黽但恐君詩未工耳工則奚愁

強疵毀益藉譏評達九重送起聲名赤霄裏况
於時事無交涉做劬寒山題木葉千齡得失寸
心知笑爾隨群走干謁請君頭上巾為君抖却
岐路塵解君身上衣為君拂去京洛緇三濯三
洗清冷池一日失機械二日忘是非三日天籟
呼吸吹勇將漫刺付流水開口盡作歡喜辭天
台石橋春已知別有野鶴相追隨苟欲避世不
可遲請君歸君勿疑

將適毗陵道中遇居簡上人

姑蘇觀下逢居簡帽子敬斜衣懶散自言契闊

漫東西雖老猶能青白眼知音不在禪床久抱
刺懷書謹奔走反舌無聲亂草間回首盡成獅
子吼荒蕪野寺孤城外赤葉黃蘆日相對午睡
雙鳩喚欲醒起傍生臺炙肩背弄筆濡毫搃蕭
索尚餘酒量添於昨語盡橫塘笛未終東風滿
面楊花落忽忽解纜攬程去從此相期更何處
一椀官醪般若湯把手同看獨孤樹

鄱陽湖

鄱陽湖浸東南境有人曾量三十六萬頃我昔
乘槎渤澥間眇視天溟坎蛙井浪何爲而起於

青雲之底日何爲而碎於泥沙之裏太極初分
一物無天水相包若雞子揚瀾可供李白青州
杓彭蠡付與盧敖洗龜殼斗大孤山沒處藏斲
取來搯鼎鐫脚胷中八九吞雲夢似此蹄涔亦
何用安得快意大荒之東東復東指麾魚鼈騎
蒼龍

靈巖上方

嵯峩樓觀青山頭昔曾避暑離宮遊吳王旌旆
墮冥漠至今古木涵清秋誰聽白紵歌聲接細
撲飛塵石榴葉銀燭吹灰別淚殘夜半虛廊響

行屨美人何處凝嬌蕊五色定化蝴蝶翻幾人
深閨有餘怨當畫巨櫟號驚猿千年惟見春風
在綠草雖存顏色改寂寞欄干繞斷腸蒲徑寒
香不堪採朝雲爲我光徘徊須臾徑入姑蘇臺
遺蹤滅跡竟難望葉落空林歸鳥哀

菰菜

八分山下灘渚叢穗彌望可愛

江邊野灘多老菰抽心作穗秋滿湖拂開細穀
芒敷舒中有一米連三稔剖之粒粒皆尖小整
齊遠過占城稻不煩春鋤即晨炊更勝青精顏
色好尋常艱得此欣逢默計五升當百叢雨多

水長倍加益十里定收三十鍾野人獲之亦自
足何用虛糜太倉粟連日秋風思故鄉况復家
田有茅屋墜網重腮鱸已鮮蓴絲牽葉又流涎
急歸收穫蘋溪畔細撥蘆花撐釣船

海棠

海棠最佳須老叢遠及百年花始紅歷有名葩
此為盛剛柯硬葉交相映倚石攢青二三丈雨
膏倒吸臙脂上髣髴璇霄發曙光細簇蓬萊綉
旗仗露欲收珠色轉深香玉萬顆藏春陰輕風
欲透紫絲障一片朝霞傾入林鳳城多少栽花

處低嫩俱無可觀樹相對令人憶故山年年雕
萼掃朱欄只今惟有溪童在應放高枝棲白鷗

吳王試劍石

吳王鑄劍成自謂古難比試之高山巔石裂斷
橫理那無昔時人相逢干將里故宮宮中白日
長春風野田百草香有誰慷慨不平事被褐踏
花推酒缸

煙波亭避暑

澄江橫匹練月洗黃羅扇捲盡白雲衣常星撒
沙見天低欲就人夜色凝深澱歛吸動微光時

絳斗間線涼亭逼曠野軒楹敞三面萬象悉鋪
陳隨機互遷變十歲逃虛空得此方一遍相對
坐談玄終宵亦無倦只恐駸駸催曉箭湧上東
方老銅片須着干求大帝君莫使陽烏眼睛轉

禹穴

若有藏瘞空山中誰人反閉玉笥峯虎笈不得
不啓封立石繚之應萬重不知靈變從何發爆
然夜半橫分裂但留一線與人窺未放白雲全
漏泄古木蒼藤閉莫開穴中惟聽走風雷神仙
必有便門出得見颯輪自往來

題葛稚川移家圖

稚川移家入空谷手招白雲守茅屋惟恐人窺
鍊藥鑪鎖斷青巒瀉垂瀑只留一徑通飛鳥其
間想透三仙島野童猶摘鳳文梨村老閑鋤燕
胎草人將外物爲真物反笑山棲衰草窟玉臼
丹成塊欲眠蚯蚓黃蒿幾鑽骨此去世間應不
遠尚存猶可分苔蘚兩幅生綃若可憑先寄胡
麻與雞犬

春濃曲

雨膏蒸土蘭芽熟粉蕊淡艷凝緜纈柳條無力

受東風桃葉春江弄花月枕函墜髮昏眠重綺
帳驚寒替花恐屏瑣蟲棲化粉蛾簾甲蜂鑽抱
殘蛹麥門冬長柔堪結桐輪輾盡棠梨雪門掩
車箱銅較閑瓶敲井榦青絲絕君不見楚王宮
中樂酣宴嫌怕旁人說春晚玉釵埋遍細腰人
章華臺上蒼苔滿

陸羽泉

擬酌松根泉先酌松下土甌犧副都籃拾薪自
煎煮一盃復一盃併酌連四五寄謝山中人腹
痛不累汝

寓宿黃觀復書堂晨至海棠花下走筆
呈蘇召叟

春風忽來花滿樹海棠最多繞欄吐客愁纔動
不復安兩脚春泥踏春雨高枝背面辭曉喧低
枝濕透揮未乾臙脂深重粉亦殷顏色滑膩脂
肉寒五雲忽卷晨粧畢曉來姿態俱已失悔不
敲門請君出喫酒忍飢看半日疾呼盃酌傾已
遲但驚野雪掃還飛可能就賜醉眠者爛嚼落
花聽鳥啼

建寧浦城李頻行祠

建安梨嶽老梨木刻作唐朝建州牧香爐忽動
吹寒灰浦城環翠陰風來嶺頭頑石盡能走澗
下奔泉皆倒回猿猱啼兮鬼嘯野六玄虬兮四
驪馬想湏吟遶碧草亭舉手高翻白雲寫峯爲
文通名夢筆楊公書堂曾散帙麗月鮮霞付與
誰煙墅有人還築室田父何所祈贈爾青藜黑
桑椹里儒何所求贈爾黃糧布囊枕萬歲兮千
秋旣往兮復留抽蘭心拆椒口斲南箕挹北斗
不假竹枝歌何湏折楊柳只用秦原妙絕詞傳
入神絃薦春酒

五雲門外小亭

醉中別高峯揮手謝平野百里伴啼猿一官騎
惡馬飛花墮城隅槁葉積亭下從教踐踏去會
有相逢者

夏日泛祕湖

朝來泛舟花滿湖亭午返棹風相呼已收波浪
入菱芡晚開雲日媚菰蒲羣飛鼓翼數沙鴈一
去沒頭雙野鳧少留霽色定堪玩可惜歸程時
已晡

送覺新上人還越

古越多精藍名僧迤相接青林瓶盃聚丹壑樓
觀疊今乘秋濤便莫待寒雨涉何處聞鳴蜚虛
廊掃黃葉

琵琶亭

蕭蕭楓林青雜出間倚櫂尚思送行舟繫此木
葉下雲開星垂山水蕩月在野江空夜振振淚
復誰滿把汀洲泥沙換葭葦顏色假變遷斐然
殊感慨益以寡黃煙飛高梳絳雪當道灑餘春
去不盡併放湓浦瀉豈無夜深彈寂寞少聽者
尚有沙灘人時時說司馬

石鍾寺

山前削成面山後不露骨何人戀巢居結屋寄
突兀多風鎖寒殿頻雨閉石窟筍透獅子傾草
蔽鴟吻沒髑髏串胡神纓絡纏古佛熹燈影摧
殘槁栢香蓬薛丹葉夏猶在綠樹暑未發坳徑
鳴秋菴閑堦起蒼鶻僧衣莓苔侵齋鉢野菜掘
梵度止數卷矧能備巾拂奔波道塗間體倦神
屢竭大險阨在前醉夢竟恍惚信陋獲安處不
勝塵土汨經房晚棲禪殆亦未易忽鐵鳳終日
叫心頗惡此物欲去欲住間征帆已超越

喜晴

久客無別望出門惟快晴茅店局促卧村靜不
打更浙瀝漸有間四簷稍收聲俯身問僮僕貪
睡語輒驚耳邊嘈噴動鄰房先戒行拂拭弄包
裹人健脚亦輕溪舂黃糧響窻掃巨竹傾山路
少泥土意想砂礫平捨夢棄衾枕披衣散縱橫
屈指計道里陡覺神思清菜老復命煮小鮮豈
足烹旅飯任麤糲苞苴且難成值雨及雷雹一
阻三宿程南北互有適後先何必爭東方曉色
至隱隱天漸明分手出門去相引行水坑

櫻桃花

櫻桃未開花遶枝櫻桃已開紅蒲溪花開幾朝
今始見人折人攀那得知黃鸝飛來問誰主對
面相看隔牆語今日銷魂事可明昨夜東風過
雲雨

豐年行

長田一畝三石收截茅作圍遮水牛馴雞塞籠
彘牢滿大兒看親女上頭里胥關門罷輸送晴
烏窺簷鼠泐棟瓦盆瓷年息老身還將孫子看
迎神廟前擘紙青竹爆錫糕粉魚夜祠竈

冬賽行

大巫舞袍奉酒尊小巫湔裙進盤盃野風吹樹
龍馬歸瓦爐栢根香滿地白衣老鬚撚向前叉
手大膽不敢言去年田家五分熟更饒三分百
事足大蠶千棚絲滿窠栗犢兩握角出肉土臺
澆酒再拜辭紙錢灰撲遠木枝神語順從杯教
吉鼓笛薨薨打三日

湘東苑

湘東王好開芳甸亭臺環繞朱欄遍就中應教
誰最多庾信江淹日歡宴七十里圍高木柵花

柳燒殘少顏色取次華林建鄴邊奚不移歸帝
王宅曾經行處蘋蕪漫賴此名存悉歆羨安知
飛來不是舊時鶯舞去都非昔年燕風擘殘桃
過短墻更無人管任斜陽惜春猶有傷心者認
作徐娘半面粉

仲宣樓

仲宣徒倚思歸後又復誰傳獨步名自昔城闔
雖尚在至今波浪未嘗平半規赤日沈荒渚一
縷黃煙起廢城梅落碎花催塞色葭橫響葉弄
邊聲驚寒牧馬頻回顧趁暖賓鴻漸北征况乃

有懷傷歲暮登樓那不動鄉情

汶陽端平詩集卷第一

汶陽端平詩集卷第二

汶陽周

弼

伯弼詩

荷澤李

龔

和父選

五言律

金壇觀

金壇深僻觀鐘磬少人聞
山果猿偷墮庭莎鹿卧分木
高猶帶雪石冷不生雲
正藝黃連炷相從拜老君

晚登黃鶴樓

戚戚登臨地淒淒欲暮天
相看數株柳不聽

聲蟬山冷雲生絮江空月上絃無緣捨塵事閑
對白鷗眠

施潭

歸程風強阻春色有如無上水千帆徃中流一
石孤雨衝尋屋燕雲背立檣烏盡說明朝順江
行舊有圖

山行

盡日群山裏知行第幾重竹深春寺磬灘急午
溪春殘旭猶雙塔晴雲只半峯豈無仙隱者恨
不少從容

野橋

日暮野橋邊都歸醉客船數竿沙際日一片水
中天影落衝煙鳥聲移帶雨蟬殆非人境得江
月又初圓

送姚希聲令弟歸剡中

客程何太急歲月半塗分想暫歸天姥還來伴
使君曉吟千嶂雪春思一江雲若再經過此囊
詩可得聞

秋屏

好山多變態排列在簷楹平野澄江練橫鋪列

嶂屏石煙寒遶寺山雨暗離汀有意携溪枕眠
看直到醒

同李雪林飲山村

本來無飲興偶此到溪灘屋角懸雙瓠船頭繫
一竿塔高風便響橋峻雨隨乾莫怕城門閉行
歸亦不難

送惟德上人還竈溪

為愛林間寺幽閑少是非因拋葦門業來着稻
田衣石蕨衝雲細山蔬膩雨肥禪居安穩後更

甲申歲解官歸故居有以書相問者

近憑筇竹杖處處作生涯獨採傍溪藥自看臨
水花愛雲因北望對日任西斜惟有雙蝴蝶相
隨直到家

送惠嵩上人住西山蘭若

孤雲無定迹又入亂山居既息禪機穩從教世
網踈曉香崑屋像寒呪石潭魚待我尋詩境看
君坐隱廬

石塘

水陸盡經過地暄晴更和鳥聲臨水近人影向

橋多細雪傾殘橘輕冰脆立荷少為鹽米計聽
徹竹枝歌

病起幽園檢校

病起無情緒池邊日幾回蟲聲低覆草螺殼細
生苔暑退蘆將變秋殘蓼續開久消環繞迹全
若未嘗來

雙林寺

杳杳雙林路林深不易登寺幽憐宿鳥地僻喜
閑僧靜徹垂梁板寒銷背壁燈水邊人忽笑猿
落過溪藤

送僧歸舊隱

自言歸去後只在故山邊紗帽臨溪盥銅瓶傍
水禪晝閑松塔雨春盡草堂煙何故相拋捨沉
浮逐世緣

冰清堂偶成

數盃恬淡酒相就等閑傾得失徒多感行藏任
獨清晝閑風有味春盡雨無聲但惜新栽柳相
呼欠一鶯

酬李達可

歸心終自遂何必戀虛聲轉覺青衫惡誰憐白

髮生掃花山石瘦洗藥野泉清應有志機者時
來伴我行

寄杜北山

一曲小湖濱幽居不厭貧坐容禪子憇家就麪
生鄰簷竹侵燈衆籬花落竈頻幾時吟得句寄
與豫章人

寄鶴林智福上人

深山高頂寺黃鶴舊曾留鶴去無蹤跡山僧幾
白頭鳥閑齋鼓靜猿嘯佛燈幽宿約何時踐題
詩向瀑流

幽居漫成

便入空山住休慵漢省書薄雲翻藥畚斜日送
柴車遠業松花膩生涯薤葉踈抱琴誰共聽一
尾石間魚

又

乍歸無定業蕭索帶村居神樹當中朽人家着
外踈藻痕千漂絮花影一床書何必爲真隱相
安便有餘

鹿苑寺

分半作民棲猶藏一曲溪鵲窺蓮葉座僧占菜

花畦白蠹魚銷粉青乾獸剥泥幸留唐刻在相
伴峻廊題

馬要寺

水國何年寺蕭條野渡邊僧驅田雀倦神抱海
犀眠細網垂秋屋殘燈泊暝船數家枯柳下猶
有舊人煙

野賽

客心懷避忌地險自多神楓葉藏山魅松根抱
石人鵲翻蒼黑翅魚曝赤斑鱗未必知風候惟
聞醉酒頻

題逸人壁

深僻人稀到天然野意成荷衝崩岸出草入廢
泉生膠木充山貨抽茶當地征未須尋伴侶時
有自來鶯

送蔣雲啓之湘中

出門岐路分願往不辭勤螢影侵湘月蟬聲隔
楚雲頻燒霜後籜多飯雨中蕢若過黃陵廟椒
漿奠小君

送僧妙通遊平江萬壽

故鄉離幾日何處躡秋陵梵葉床頭樹唐衣壁

面僧雨花粘舊錫風籜掃寒簷新偈期相寄呵
彈破小乘

酬杜八同宿西山蘭若

西山龍井路俱有舊行蹤待得城中暇重期石
上逢冷霜粘破屐落月帶殘鍾擬踐相鄰約煩
君買一峯

菩提廢寺

野寺孤僧住當春亦掩扉曉鍾三板去昏杵一
盂歸古屋垂山榷幽窓養石韋未容行客憇荒
樹雨鳩飛

天申宮蘇文忠畫像

大澤沾荒裔靈山識老臣微茫雲外跡衰病瘴
中身濕草寒碑夕晴花午殿春高簷風雨斷猶
避六丁神

誓節渡

髣髴經行地還尋古渡邊山禽多白練溪藥間
黃連漠漠將晴雨迢迢欲暝煙恍然驚夢醒二
十有三年

白羊

路隔一重溪山深客易危驛亭惟有額官堠盡

無碑竹掛黃身虺林香白面狸得船爭欲渡先
奔槿花籬

送人遊邊

平世絕邊籌憐君古塞遊誰聽崩絃劍虛弊黑
貂裘宵折鳴荒戍寒烽起廢樓到應先吊古慟
哭峴山頭

春暮登黃鶴樓

欲盡殘春酒登臨事已違聽殘懷舊笛添盡禦
寒衣鳥向青山没人來赤壁稀最憐城側樹無
可作花飛

為僧曇芳賦草堂

把詩從我者多是剡中僧結屋何山塢當門幾
樹藤地寒常帶雪溪峻不留冰贈爾新吟去歸
題木葉層

江臯送別

把酒對汀洲相看發去舟迎風一分手驚浪幾
翻頭燭暗花消淚楓寒葉弄愁恐猶回首望終
夕凭高樓

送胡宗原還台山

故里杉松表歸程筍薤初盃多常失飯囊罄只

留書海墨收秦棄山糧拾禹餘古來仙隱者多在赤城居

千金寺

十載他鄉別春歸逐浪層晚晴沙市鼓夜雨石橋燈帆仄摧乾葦衣寒脆薄繒舊時來往寺惆悵不逢僧

留別唐棲雲泉上人

水宿唐棲寺何緣更浹旬千山今日路三歲異鄉人小殿眠身佛空廊折臂神歸時重作禮又拂一番塵

天章寺前小樓

客懷依古寺曲水茂林邊俯聽礮鳴石靜看山出煙傍花清晚漱對竹冷春眠深羨溪僧樂幽居動歲年

野望

春日晚荒荒平沙極渺茫樓歌三面水城卧數條崗白草吳京甸黃桑楚戰場長江俱不問一片瀉斜陽

楓橋寒山寺

江楓吟詠工幽寺冷遺蹤不改前朝路猶聞半

夜鍾地涼汀月皎村迴水煙濃試問誰曾見惟
應獨有松

送黃同甫

人生各有安出易欲歸難古道春泥重孤城暮
雪寒酒鋒精似將詩業遠於官野穀如堪飽從
君借鶻冠

應潭

村崦迤相遮分居兩岸沙地征兼橘柚土物半
桑麻水白來如虹山黃去若蛇往年曾泊此叢
竹數人家

招鄭服之

歸心同一路况復在新年夢着登山屐閑隨渡
水船宿蒿迷舊隴春葑起閑田醉卧天池上知
君在我先

靈竺寺

有孟宗祠

不因純孝者古寺若為安壁彩蝸遊遍爐香鼠
踏殘鍾聲嘶破槌幡影颭危竿尚恐冬生笋時
來竹外看

齊安早眺

昔日干戈地淒涼古塞情軍同民雜戍州與縣

分城野曠孤鴻絕沙寒一騎行十年生息後人
尚怯論兵

又

陰陰城壘靜極望不飛塵草色橫江暮鶯聲出
塞春清時應洗甲來歲又逢辛惆悵經過處都
非徃昔人

村市

細簇人家住中分破石崖竹門開店屋草市夾
橋街水別東流漢山橫北過淮並船頻借問同
買出江柴

贈僧仲寶月溪

幽棲深絕地靜夜獨耳僧上下兩輪玉中間一
片冰影收懸罟索光息過船燈獨坐觀心了無
由更小乘

題夏肯父曉山圖

旦旦自天成中全一炁清漸分平與峻俄轉晦
爲明竹闥鋪沙影松涵出谷聲機心都不動穩
看日初生

孫季蕃故居

笑語失詼諧人誰不愴懷夢殘秋雨寺菟散夕

陽街缺竈粘煎藥乾爐積燎柴風流何必葬便
擁菊花埋

趙東麓歸自房陵

一年辛苦後收聚若為豐攝職全無吏携家僅
有童乳舂花下管漆溜葉間筒自此嬉遊地應
須且浙中

汶陽端平詩雋卷第二

汶陽端平詩雋卷第三

汶陽周

弼

伯弼詩

荷澤李

龔

和父選

七言律

吳山仁王寺

山寺憑高夕未昏上皇曾此定乾坤甌閩散驛
緣江島龕赭收潮入海門細雨亂花唐輦道淡
煙踈柳漢營屯何時汴水東流畔君返宸居
臣故園

庾樓

欲望江山夜轉真胡床曾此對嘉賓傷心皓月
長流水回首清風不見人花落雉樓橫角暮草
生鷗渚破船春歸程豈暇頻登覽分付羈愁與
白蘋

題豫章臺

何日遺蹤鎖斷崗更誰曾望舊臺荒百年南渡
頻秋雨一片西山幾夕陽石礙老松歌徑險岸
隨乾葦出江長斗間可是無佳氣又見飛鳥繞
去檣

題滕王閣

高閣巍哉接水濱興亡纔問便傷神鳴鸞東閣
知何處跨鶴西山別有人柳映落霞江渚暮草
鋪斜日野田春羣鷗亦厭多悲感偏與忘機客
最親

送友人持節嶺南

吳雲迢遞楚雲鮮從此南征路幾千漢使五羊
登嶺日曾經三豕渡河年榕穿白草飛蠻兩椒
落黃芽起瘴煙待及戍瓜多載石定無番貨入
歸船

贈唐樓寺僧

山門寂寞唐棲寺別去閑居又一年草暗暮田
羣鴈遠花明春院一僧禪雲房夕磬浮清雨水
殿寒燈宿細煙作得詩成無寄處幾回遙認隔
溪船

連珠

遠望披裘日幾回可堪江上暮寒催雲飛曠野
迎風斷雪洒長灘夾雨來馬踏野橋嗽破板鳥
迷村路立高桅暫須移向踈籬泊遷就驚春一
樹梅

行吟

獨行沙岸不相携準擬沿溪更渡溪藥蔓交加
蟲上下柳花撩亂蝶高低杖頭曉伴春雲石屐
齒晴翻夜雨泥詩就隨山為人寫等閑抽盡錦
中題

秀野

小作幽園傍宅開只須數畝占樓臺石移林屋
秋雲至水帶松江暮雨來徑草散香迎過屐砌
花分影蔭流盃人家園圃應無數不似君能日
幾回

孫伯符墓下

樹葉蕭蕭墓草長
夢魂曾斷九回腸
空聞絳帕離章水
誰見黃旗入洛陽
鴉噪暮園江阪迥
龍盤春戍石城荒
赤烏不識桑田變
猶自悽悽守白楊

天津橋

裊裊朱欄倚細波
綠雲相對悶差我
中天車駕曾擒虜
何日樓船定入河
霽柳午陰隨岸遠
露桃春色過牆多
黃旗適應東南運
已辦簫鏡幾曲歌

雨花臺

細蘚柔莎瑣舊堆
昔年曾見異僧回
如何天上飛靈雨
不爲人間洗劫灰
江接潮頭諸脉應
地連崗勢一支來
只今不假虛無事
別是春風歌舞臺

鳳凰臺

一徑逶迤草自芳
何爲不復更翱翔
應須舊國還宣武
別有高臺在建章
白鷺背花尋塔路
赤烏衝柳集宮墻
中興不比偏安事
且對梧桐薦羽觴

烏衣巷

日落凭欄感慨頻長干橋畔冷殘春桑田蕪沒
徒多事蘭玉叢生更幾人風暖影翻花外燕雨
多痕蝕草間麟堪嗟羣從成功後不及鍾山一
尉神

石頭城

點點凝煙望未收六朝遺迹遍荒丘自從絳闕
雄江面誰把朱泥染石頭崗斷曉榛雙阜虎岸
長春草一灘鷗諸公多少新亭恨不是知心莫
上樓

浮遠

橫障瀰漫恃此丘長江東驚轉湍流波間去海
無多里沙際鋪淮輒數州風勢起花山郭暗潮
聲侵樹野田浮無由望徹蒼茫外回首斜陽總
是愁

送趙山臺赴江陰

匆匆何事解朝衣甫為君王領一麾歷考近來
成故事就遷長是未多時寒更夜徹防淮拆曉
船晴翻出海旗不久赤蹠應已到只須畧賦練
江詩

岳陽樓

憑高望盡寂寥天與我閑情共渺然
平展暮雲三百里積停春水二千年
沙洲橫渡荆江雨石塔遙分岳麓煙
老我未聞飛劍術想須今度遇回仙

西湖竹閣寺

精舍蕭疎近水涼分明一徑綠沉槍
就移山近湖皆隱放出樓高寺倒藏
春透露梢齊曲檻曉翻風籜過脩牆
長堤花盡人稀少來聽蟬聲伴夕陽

採香徑

繒甲如荼護此臺玉顏憔悴錦帆來
一蹊香草無蜂過千里空葭有鴈回
響屨蘚埋丹鳳迹縷衣花變粉蛾灰
誰知子夜歌殘日樹滿西山似綠苔

七里瀨

瞬息公流七里遙感時回纜木蘭撓
高臺未變陵兼谷故國頻更市與朝
風散亂雲通去驛雨消殘雪助歸潮
漁翁近亦無前輩一箇青銅不肯饒

南樓懷古五首

昔人有意久經營極望寒無遠更平三國旆旌
羣鵠散六朝樓閣一鳩鳴雪消晴嶂沉孤壘風
打寒潮入廢城多少怨菟銷不盡草根燒斷又
還生

其二

事久銷沉只等閑好將深意迤相參舳艫宵遁
誰思村袞屐春游自笑談西日瘴回迷漢沔北
風波逆上江潭隔城方唱招菟引一拍殷勤至
再三

其三

茫茫迂曲度平川何處孤村近水邊煙護劉琮
殘壁壘雨沉黃祖舊樓船寒沙細擁菰蘆地破
隴斜耕首宿田見說去年秋潦後更無茅屋起
炊煙

其四

幸際清時息五兵舌頑無處說縱橫蟻封一夢
難分別蝸角千年強鬪爭丹壁郵亭新蜀道白
樓烽戍古邾城自知夜半徒興舞移遠寒鷄不
使鳴

其五

夕陽光退杳難憑欲問江鷗只怨憎得意舉帆
燒北岸傷心流柿鎖西陵雪消蜀貨千檣下風
順吳鹽萬斛增且趁一樽相暖熱自非乘醉莫
來登

山居春晚

索居牢落動關心但覺忽忽歲月侵無夢不因
憐晝靜有懷多是惜春深草香稚蝶銷胡粉花
落蠻鶯變楚金最是不禁芳樹色能消幾日又
成陰

庭下枯梅有感

庭下同栽兩樹梅一株搖落一株開無緣春色
相虧曲有分晴光亦往來雪打枯枝愁漢驛雨
翻雕萼夢荆臺綺窓不斷橫斜影猶有東風管
碧苔

會稽山

衣冠從昔化文身峻嶽當天自有神秦帝刻碑
三十載越王棲甲五千人江連雲氣分南紀海
接星河近北辰必竟興亡誰可料但聞陵谷變
飛塵

甫里觀陸魯望故居

天隨清調何人繼幸有荒村故宅存橋上蠹蟲
應屢變草間眠鴨尚能言池亭暮雪兼風起籬
落春潮帶雨渾人啖菊苗終竟別屠沽猶自不
登門

陳武帝釣臺

路纔容馬盡荒茅誰識仙人舊釣鼈流水不隨
船影斷亂山猶帶彈痕高春煙粉黑重生葑暮
雨灰紅半折桃今日故宮何處問東風應長對
江濤

贈雪林李和甫

忽地相逢便解顏况兼終日看青山精神摘柳
哦詩際標度尋梅集句間春淡野橋孤艇遠暮
寒溪寺一鍾閑忽忽又作經旬別兩處東風各
閉關

道中有感

遠程已過經行處別有逶迤古道存寺已寂寥
猶有殿水纔窮盡又逢村一株枯木人分路十
里飛花客過門必竟悉依生處樂不知何事別
家園

黃溪

忽忽寧不恨飄零轉更分岐過別汀世事總如
迂曲路年華都付短長亭冢桃褪藥無人色社
櫟盤根作鬼形心自感傷人豈識回頭猶顧峴
山青

朱潭

消散羈愁益坦然况當初暖欲晴天清溪苔滑
重抄紙淺屋柴香正煮綿隔水殺鷄祠社土過
橋嘶馬入人煙今朝似覺難忘酒應更無人笑
謫仙

送人之漢上

木落千山怨別離自知難駐馬行蹄上書李
窮歸洛獻賦荀卿老向齊驛店破旗秋雨細
樓殘角夕陽低袖藏秘策君門遠應望中原
泣鼓鞶

荻港

波眼泔泔浪復輕稍甦羈束過清明倩人覓路
先尋酒久客懷鄉始見錫松下紫芽肥野菜竹
間青葉帶山櫻自從一別齊安後直到今朝始
聽鶯

感事

書劍悠悠屢變遷老諳多故始知天汗青每愧
拋長日髮白無由逐少年暮雨暗消江岸柳曉
霜初透野池蓮此心懸解何須語人問惟應一
指禪

送遷客

自謂別離難會面如何此地又相尋往來雲物
他鄉意輕薄風塵久客心夜雨泥塗三里郭夕
陽煙火數家林送君好去加飡飯莫聽哀猿徹
曉吟

送人之京口

競携書劍去紛紛誰解登臨對日曛北道荆夔
一江下南朝徐兗二州分高樓角曉鳴秋雨遠
戍烽寒起暮雲莫把尋常望瓜步恐驚邊鴈不
堪聞

留題唐棲寺

僧房十日相留戀為怯生寒未到家插岸斷冰
妨蕩槳入簷飛雪助煎茶香臺穴碎逃秋蟻古
殿巢翻失暮鴉惟有溪梅最禁耐傍籬爭發向
陽花

送白判官

著書不就便相拋，遠向襄州謁故交。
里舍千頭無舊橘，客程三脊有荒茅。
買魚村渡捐孤劍，沽酒山城解弊袍。
雙鬢豈堪禁歲月，眼看歸鳥又成巢。

中和節

時節匆忙過隙駒，可堪岑寂就船居。
不禁衰病慵耽酒，無益閑交懶報書。
風暖暮田歸海燕，雨甜春水上潮魚。
客中自是光陰速，纔見新正又月初。

送人之荆門

昔年此路達王畿，荒燒畬煙事已非。
山向嶠函空北望，水隨江漢自東歸。
淒涼坂路征車遠，寂寞郵亭候火稀。
遙想思鄉怨岐路，杜鵑花發鷓鴣飛。

嚴陵釣臺

晴江萬里綠波來，惆悵君房去不回。
秦苑河山歸故國，越鄉雲雨庇荒臺。
春風一道江蘿綠，落日千峯杜宇哀。
欲訪釣船無處所，野花如雪滿汀開。

遊道場山遇雨

飄然久作登臨想，纔遇名山雨亦遊。
林尾亂聲猶間響，枝頭殘滴未全收。
濯翻野竹從教暉，衝落巖花放出流。
欲把姓名書石上，幾回拈筆又成休。

浣沙秋日五首

衣裳單薄鬢蕭騷，獨凭危欄首屢搔。
出壁亂雲分片段，隔江飛雨見絲毫。
庭前斷續蛩爭響，簷外輕便蝶鬪高。
多少好山俱在眼，愧無短屐共遊遨。

其二

當前灘號西施磧，對磧看秋得句清。
五色懸門秦一尉，六經充棟漢諸生。
石叢細火團荒砌，野蔓踈金出廢城。
目送浣沙人去後，又聞街鼓報新晴。

其三

長江淡淡樹踈踈，掃却閑庭即故居。
蟲入暗床頻促織，螢穿虛壁屢翻書。
破除暮色惟荒菊，薦送秋華有嫩蔬。
料得故園分社酒，小苞青橘四腮鱸。

其四

自慙尸素嘗多暇未放秋風變楚顏一夢別離
拋白水三年端的守青山野鷄避鷓鴣遮鷓去沙
翻銜魚趁母還縱有亂愁消遣盡淡雲殘日共
人閑

其五

清溪樓閣暮沉沉不覺登臨夜欲深幾處捲簾
催酒笛誰家閉戶搗衣砧一朝野霧三朝濕十
日江天九日陰暗喜礙人公事少自來收拾送
秋吟

羅家洲

對港近村俱有路扁舟倍覺往來頻入秋破褐
惟存線盡日收錢不滿緡遠岸冷沙嘶墜葉淺
灘寒水卧枯蘋未知行役何時斷縱使更深亦
喚人

送陳雲崖遊三衢

吟得詩成若等閑為吾開盡錦囊班不專瘦島
元和末要且長城大曆間帆入亂潮隨漲水帽
衝殘雪度危山從今便少春游伴纔過新正可
得還

汶陽端平詩集卷第三

汶陽端平詩集卷第四

汶陽周

弼

伯弼詩

荷澤李

龔

和父選

絕句

春怨

極浦蘋花白
空壕蘭萼紅
傷心城上燕
飛入館娃宮

送客

欲知行遠近
細數杜鵑聲
暗入蒼山去
千聞是一程

冷泉幽憇

水源窮不盡垢膩生春襪未敢輒揭流且向幽亭歇

落梅

玉樹分明照夕流粉痕翻為碧苔留三更枝上玲瓏雨亂滴寒香一夜愁

回山僧書就題書尾

憶昔同行題落葉寺前枯樹鶴巢邊不知今度苔枝上多少秋蟲已化蟬

逢僧文禮

空山落日又逢僧雨雜塵灰滿帽紋但憶來時門不掩麝香偷卧石床雲

又

師說古香寮舊開鮑昭曾為惠休來至今猿鶴猶知敬靜對寒星禮碧苔

秋夜

山門半掩浮雲闕古道入稀芳草歇夜深零露滴秋香幽人獨步青蘿月

寄雲泉僧永頤

書來只說住高峯不記松林第幾重欲揀青巖

問茅舍秋山一樣白雲封

又

頌罷南華誰得聞兩川寒玉一禪身松邊彈舌
低聲念莫引龍來變作人

贈從古上人

山僧袖出新詩卷字字馨香撲人面清晨何處
展看來捲得梅花兩三片

野廟

野廟荒蕪倒掩扉寂寥香火客來稀年年歸燕
相看覩空滴春泥損畫衣

真娘墓

青鳥傳書渡海遲亂山衰草葬蛾眉錦囊消歇
餘香在狼籍春風豈惹枝

女墳湖

石龜無語對東風海鶴曾迷曉市中三十六鱗
朝夜月玉釵人在水晶宮

顯應觀桃花

白雲隨鶴乘將去深碧桃花滿故宮三十六簧
明月夜不知何處吸春風

四聖觀

小園寬占一山孤，別有墻遮古觀居。
到了恩波攔不住，水窓遊出放生魚。

蠟梅

愛花偏倩獵人尋，殘雪偷春上棘林。
山岸有誰先得見，冷香踈亞辟寒金。

詠史二首

一曲呼凰下九霄，石臺春靜海山遙。
周秦戰血縱橫盡，猶卧白雲吹洞簫。
碧樹童童蔭屋廬，分明青蓋盡龍車。
南陽病叟成何事，便謂枯池活得魚。

送人遊西山

昔人深夜看星斗，鎮壓靈壇尚有符。
偷寫只應蒼鼠慣，幾行丹篆繞春蕪。

其二

鎖斷寒蛟亦有神，冷波寒水病殘身。
誰收匙鑰權相借，畧放天池洗白鱗。

其三

抽鈿點汞舊臺荒，何處搜尋舊草堂。
誰見洪崖最深處，一坑泥護石中黃。

出關偶題

一曲長歌浙水寒
綈袍空往又空還
咸陽若有山東志
莫放蘇秦又出關

吳門送同行者之毗陵

布帆何處定逢春
身是歸人又送君
明日隔城回首望
冷花寒葉滿秋雲

西湖初夏

花飛春減綠陰成
不住風光繞禁城
山寺晚晴蟬欲噪
柳林猶轉數聲鶯

送曲江友人南歸

憐君歸橐路迢迢
到得茅齋轉寂寥
應歎藥欄

經雨爛土肥抽盡
縮砂苗

客樓

水國秋清潮半生
越王臺殿鎖荒城
西樓一夜思歸客
斜倚朱欄獨聽笙

夜深

虛堂人靜不聞更
獨坐書灰對夜燈
門外不知春雪霽
半峯殘月一溪冰

胥門

蘆葦蕭蕭生晚潮
伍真何地更吹簫
夕陽自逐寒鴉去
萬片宮花共寂寥

送人還姑蘇

別十三年返故居可憐世業半空虛布囊惟有
焦琴在乞與秋風葬闔閭

題僧子溫畫水墨蒲萄

裊裊多應半熟時落斜高掛冷攢枝分明記得
山窻下一架寒藤帶雨垂

望太湖

獨立瀰漫灝氣中倍饒雲霧杳重重直西一道
孤光起指點人看是白龍

又

眼力難窮遠即昏縱睛惟只兩三分今朝林屋
人皆見不似峯巒只似雲

收家信

渺渺秋風生白波故鄉歸夢隔山河可憐一紙
平安信不及衡陽鴈字多

聞友人過吳

詩囊掛在船篷上吟過江楓落葉中為恐其成
題不盡秋風先燥數堆紅

彩雲橋

斷橋流水兩無期殘日輕雲處處疑乞與行人

自沽酒蒲旗風雨豆花籬

龍井道中雜紀

白髮宮人頻笑謔羅衣昔對君王著夜驚春雨
洗桃花夢菟猶掛鞦韆索

又

老僧病久聲嘶喝屢說紫衣勝短褐莫嫌兩手
漸拘攣曾把御前供奉鉞

山崦早梅

晴逼寒筓春蒲鄰漢奩芳額漸輕勻東風未放
全消息雨萼愁香不見人

青陽驛

悄悄如秋麥氣涼山風吹透濕衣裳小爐深幌
枯松火一夜寒香遶客床

舟次黃鶴磯

俯為江山特地來勢須時暫走塵埃稍閑便着
携官酒一酌吳王舊釣臺

聞鴈

此是衡陽第幾羣寂寥偏雜雨聲聞如今遠道
多增繳莫厭高飛入暮雲

風惡偶成二首

柔櫓雙隨下水船
亂帆輕袖迤相先
無端繫着山村岸
高枕蘆芽對雨眠
三日要行還止住
冷沙寒水暗消春
一千四百蕪湖路
怨雨愁風多少人

溧陽桃花

見說謫仙曾到此
東風千樹鎖雕墻
游人偏向花間酌
雨濕春泥噴酒香

延山渡

解帆登岸作山遊
林木茅茨共一丘
數日驟寒消不盡
尚餘殘雪護松瘤

蕭山縣下遇雨二首

年來沙漲卒難消
更覺西興渡口遙
冷坐看他騎騾馬
半鞍泥水踏春潮
悠悠心厭出江沙
過得丘亭轉落斜
村店自知行客倦
勸嘗新酒賣甜瓜

大洲湖

人居澤國勝居陵
十月陂塘未結冰
葦亂茭收拾後
斷篴分驪折腰菱

道間偶成

彎彎田角路周遭
摘盡柔柔露淺高
無限寂寥

門半掩一車偏健夕陽綠

早春

連朝微雪暗消凝始覺春風逐旋增今早盡簷
偏有意數條吹折曬殘冰

送人之漢上

舊來邊塞自多塵瘦草寒花強作春見說連年
更悽愴亂螢隨趁鬼迷人

思歸

開裏看山不識真偶來軒檻振衣塵諸峯便覺
移相就分付春風欲去人

其二

點點楊花飛滿洲只應催促送行舟非關向晚
傷心事自怯春寒不肯留

其三

盡日憑欄客興濃山雖西遶水還東便乘春暮
家園去猶及棠梨滿徑風

其四

自覺才疎久願歸敢將山色便相依漢家事業
雖全盛亦放梁鴻一箇飛

贈野逸

時康難售賈生醫諫鼓無聲對落暉又報一年
花信了蒲山鷓鴣送春歸

又

悠悠行路雪侵頭擬出重關洗弊裘堤上忽逢
憔悴客背花停酒說通州

下渚秋暮

淺灘近渚沙相接水落漁人朝暮涉撼撼風鳴
若雨來繞堤吹散乾荷葉

秋日馬上

本無謀畧強談兵每媿臨邊病未能筋力豈知

猶可喜一鞍千里到江陵

許市罩魚

網邊分得尾纖纖腥却尊絲莫厭嫌自有野人
相料理柳陰茅店一包鹽

歲除思歸六言

山樓書到多日野渡舟橫幾回想見溪邊亭上
故人待我啣盃

其二

春風冰斷千尺曉霽雲開百重何處溪橋爭渡
誰家山寺聞鐘

其三

野屋定堆落葉山徑應鋪石蕪一別經秋不到
隔籬黃犬誰呼

汶陽端平詩雋卷第四

竹莊小藁

宮怨

清源胡

仲參

希道

淚粉羞臨寶鑑前淡粧爭似舊嬋娟一言曾忤
君王意閉在長門十五年

寄竹院方丈孚師

江湖歲月易銷磨振錫歸來鬢欲皤性懶吟編
多散逸門閑俗客少經過虛欄破處懸蛛網落
葉空中見鳥窠一片師心誰會得半窓竹影綠
婆婆

郊行暮歸

吟罷歸來興欲狂
重城半掩傍昏黃
鐘聲遙動山靈答
月魄未高人影長
竹葉淺斟杯量窄
梅花滿插帽簷香
不妨竟日酬心賞
纔到明朝事又忙

偶得

欲問梅花信
山寒去未能
靜思天外句
坐對夜深燈
戒酒頻添衲
煎茶旋鑿冰
月殘霜又落
無復叩門僧

醜婦吟

君不見漢殿丹青未漫滅
馬上琵琶向誰說
又不見華清舞破霓裳衣
凌波竟墮嵬山血
從來艷色多累身
妾貌雖醜心自悅
幽閨到老無人知
白髮如絲鏡如鐵

晚雨

勃姑鷓鴣舅叫樓
西春景色陰晴景不齊
濃墨四垂收未起
明邊一片夕陽低

端午

千年流水去滔滔
此日人來弔汨羅
江上畫船無買處
閉門風雨讀離騷

山中作

村居便野性况復是清秋為愛山間好因成旬
日留林深喧鳥雀露重滴松楸昨夜新寒入篝
燈覆弊裘

入京第一程

六載館杭州重來訪舊游山中纔過雨客裏又
驚秋嵐氣蒸衣濕泉聲激石流功名苦行役羞
見渡頭鷗

道中早發

未曉催行色微吟獨據鞍露垂星影濕月淡水

光寒犬吠知村近雞鳴覺夜殘親闈在何許誰
念客衣單

秋晚泛湖

載酒湖邊買小舟水光山色解人愁短籬寂寂
菊花晚兩岸蕭蕭楊柳秋落日波間收戲鼓暮
煙林外出歌樓倚欄長嘯西風裏驚起前汀雙
白鷗

試後書懷

踏徧天涯路春三秋又三文章與時背言語對
人慙湖海氣何餒山林分未甘閑僧時過我揮

塵共玄談

夜坐偶成

一字吟難穩沉沉夜向闌燈明妨短夢衣薄犯
新寒千里家山遠三年客路難明朝有佳便尺
紙報平安

送諸葛春卿還里

扁舟分袂出湖濱我向吳中君向閩自笑吟身
猶是客却來遠道送行人家山會友憑傳語旅
舍逢詩為拂塵天北天南相憶處梅花毋惜一
枝春

得家書

手剥鱗絨細細看北堂垂白喜平安為憐客裏
多霜雪寄得衣來正及寒

雪晴泛湖

雪後湖清淺令人心眼開林疎知寺近冰合礙
舟回寒色欺吟鬢斜陽入酒杯山行已清絕况
復是尋梅

春晚見山茶花一枝獨開

茶蘼開盡見山茶血色嬌春帶雨斜莫是今年
逢閏月東風吹到背時花

山中口占三首

四野平田春水肥
前山隱隱帶殘暉
千林晚色無人共
時有樵翁獨自歸
躑躅花開野色濃
和風和雨卧叢叢
城中只買零枝看
那似山頭滿樹紅
飯罷呼僮旋煮茶
棊枰詩卷小生涯
從今厭踏紅塵路
多在山間少在家

夜坐即事

午夜空庭寂
心閑坐亦忘
竹間風動靜
雲裏月行藏
驚鵲出幽樹
寒蛩語廢廊
甌茶聊當酒
清

氣入詩腸

題墨梅竹

洗盡丹青料
清高絕點埃
數竿無韻竹
一樹不香梅
與可今已矣
補之安在哉
千年好風致
喚上筆頭來

聽雨

聽盡燈前細雨聲
聲聲總是別離情
何時斷得閑煩惱
一任芭蕉滴到明

夜坐與伯氏葦航對床
閱江湖詩偶成一首

對床因話弟兄情話到山林世念輕
几上江湖詩一卷窻前燈火夜三更
茶經未展神先爽香片纔燒味較清
吟罷忽聞譙角動石橋霜曉有人行

薄暮

薄暮抱幽獨無言倚小樓日沉千樹晚
風起一天秋警枕團新夢寒衣帶舊愁
祇因吟太苦餘病未全瘳

山行

石磴手難攀林深去復還人行啼鳥外
僧住白

雲間野興平秋水吟魂繞暮山馬頭風作惡
潘鬢任闌珊

月夜聽琴效漁父辭

風入古松成節奏泉奔幽磴響琮琤琴中彈
意不彈聲猛拂朱絃燈焰落細敲玉版夢魂清
啼鳥枝上月三更

寒中偶題

酒對紅爐煖香凝繡被温
老天有私意寒不到朱門

枕上得句寄潛君升

無柰蓬窗雪打聲夢魂纔穩又還驚枕衾如許
猶嫌冷多少閤閤睡不成

留宿陳氏書齋

因訪吟朋到竹居春寒策策動窻虛幾番好雨
偏留客一盞青燈共讀書徐孺舊曾親下榻陳
遵見說好投車與君靜夜評心事萬斛閑愁盡
掃除

游白石山觀音寺

綠陰深處石橋橫繞入山門意便清林下一僧
無箇事時來倚樹聽泉聲

與生上人

久住深山裏相忘物外形逢人出好語入定掩
殘經古字碑成軸名詩榜作屏欲知祖師意柏
樹在中庭

生公以右軍帖軸之几間復以
李涉游鶴林寺詩為屏故云

雨中

愁坐黃昏掩客扉風翻霜葉滿庭飛孤燈挑到
寒更盡猶有行人帶雨歸

讀岳鄂王行實

飛鵠來何意英雄此日生山河張膽氣宇宙載
風聲一片堂中紙千年身後名至今墳上木猶

作不平鳴

和林梅臞西涼瀑布圖韻

瀑駛驚風雨危懸峭壁前臨流清客耳入夜攪
幽眠旁是龍為廟高疑山有仙一塵飛不到長
似九秋天

喜郭希范自上庠歸

馬蹄明日是君家千里歸來傍節華幾夜深閨
寒寂寂有人和淚卜燈花

用伯氏韻東梅臞

捐拙爐前坐夜深寒侵窻戶月西沉冥搜天地

無窮趣寫盡江湖一片心霜葉落邊添客思梅
花瘦處動高吟訪君欲問推敲訣擬把清樽共
細斟

東竹院孚老

別來旬日許又過一分春因感塵中事空慙物
外人吟清便境靜語苦見情真近况知何似篇
詩得細詢

送梅臞還三山

十年湖海上此日值梅兄一見纔傾蓋相逢又
問程新編聯畫卷清話入詩評從此雲山別因

風時寄聲

題雪舟雲心二友吟卷

君詩何所似絕似晚唐詩寫出春雲狀融成白雪詞百篇多態度二妙一襟期與我為三友他年題品誰時二公約刊三友集

清明

杯酒濃澆壠上春東風吹起紙灰塵可堪腸斷中原路草掩荒丘不見人

寄黃雲心

竹屋少行跡閉門春晝長天時半晴濕人意共

炎涼苔蘚侵堦綠茶蘼壓架香冥搜尋杖屨不為看花忙

采桑女

葉滿筐箱花滿簪低頭微笑出桑陰後來若有秋胡子說與黃金必動心

過永春縣

距城纔百里世路便難平碣石唐人墓桃源晉地名危譙依嶽勢荒市帶溪聲往日惟兵火頽垣蔓草生

圩田

圩田依澗水入夏未栽禾不是春耕晚山中寒
氣多

閨中詞

寫就相思字燈前帶淚看欲緘還未忍少待淚
痕乾
聽盡芭蕉雨愁人夜不眠憑誰將此意為妾到
郎邊

早發

早發六七里前涂曙未分漁舟依岸立水碓隔
溪聞獨樹支殘月空山半白雲清晨那可駐日

出又如焚

無題

露重濕征衣風急翻紗帽山下灌園人倚鋤看
馬過

過界首

幾重嶺隔幾重灣路入濛濛煙雨間獨立溪橋
重回首前頭已是劍州山

思家

夜夢到山居回頭千里餘屢傳歸去信不得寄
來書小逕應添笋荒畦欠理蔬客程頻得雨田

里事何如

漁梁嶺禹廟

古今陳迹幾興亡
閩嶺何因祀夏王
莫是當年平水日
曾驅魚鼈渡漁梁

陵上釣臺後

身為功名役
因思隱者賢
只行山後路
羞過釣臺前

西湖會上和趙靖軒韻

不着人間半點愁
每於勝處一凭樓
吟邊只欠林和靖
坐上追思馬少游
暈臉笑蕖酣薄暮
低

眉揚柳拂新秋
酒闌拍掌狂歌舞
自是忘機可狎鷗

秋意

梧葉飄殘客夢驚
擁衾危坐到天明
片心除是眉頭識
萬感都從念脚生
江上鱸肥銷旅况
樓前鴈過帶邊聲
挑燈無語閑商畧
謀國謀家底計成

還趙靖軒吟卷

借得君詩在案頭
篝燈夜夜看銀鈎
苦吟暗數秋更盡
何處笛聲人倚樓

重陽

漫浪江湖已十霜，一秋強半又重陽。
可憐白日渾閑度，偶對黃花覺自傷。
客舍題詩書感遇，市樓沽酒慰淒涼。
登高不為酬心賞，直欲凭欄望故鄉。

夜來聞曾性之丘君就二友隔樓吟聲
不絕以詩柬之

月下歸來深閉門，衾寒時倩博山溫。
隔樓忽聽吟聲苦，引得清愁入夢魂。

問性之病

莫向推敲苦用心，聞君病裏亦沉吟。
書燈挑盡無人共，藥鼎煎殘到夜深。
霜後菊花方寂寂，臘前梅事又駸駸。
相看咫尺如千里，幾度逢人問信音。

過千頃寺訪谷隱老

別久交情淡，重來似舊時。
人生雲聚散，世事月盈虧。
茶具權行酒，禪牀借看詩。
漫天多雪意，預約探梅期。

性之尋梅歸來有詩因感一絕

處士廬前門徑深，僅留佳句與人吟。
孤山近日

無行路踈影暗香何處尋

枕上偶成

客樓蕭索抱愁眠
鴈過聲聲到枕邊
念脚動如魚撥刺
吟身寒似鷺聯拳
匣中幸有劉琨劍
囊裏猶餘杜老錢
忽憶西山山下路
夜深霜露滴松阡

夾河中有矮道人自住小舟持呪為生

人莫不異之者

道人神貌古雙鬢欲垂肩
坐席容三尺浮家住
一船養生憑佛果
持鉢信人緣
早泊橋梁下
蓬

頭起白煙

寄嬾庵

天寒日短道路長
白雲飛處知吾鄉
大江之東渭之北
念我故人何可忘
別來楊柳春依依
只今開到梅花香
扁舟漫浪歸未得
京塵海裏安行藏
身名未立仰天笑
牀頭夜夜鳴干將
鏘音羨師物外無寵辱
庭前柏樹常蒼蒼
吁嗟念羽飛不到
二千里外空相望
五雲前墜滿室光
報師之意無以將
篇詩濃墨繞淋浪
一聲鴈過天南翔

偶得
挑燈伴寒夜兀坐竹爐邊赤脚知吟苦時將山茗煎

和性之見寄韻

窻燭銷殘轉寂寥柴門無復野僧敲偶來枕上吟詩就記向心頭欠筆抄鳴竹數聲疑雪片尋梅清夢到山坳世情雲雨多翻覆誰是江湖耐久交

游山中

世途平處起波瀾輸與高僧占好山竹塵直為

揮俗具槿籬虛設掩塵關林泉有分酬清供瓶錫無人伴此閑擺脫名韉須早計半生猶得住雲間

寒夜作

生計尚茫茫微吟思故鄉羈愁消不盡寒夜未為長門掩梅花月禽翻竹葉霜挑燈裁錦字明發有歸航

讀秦紀

萬雉雲邊萬馬屯築來直欲障胡塵誰知斬木為干者只是長城裏面人

雪

凝雲商作雪頃刻滿天涯片片踈還密霏霏整
復斜映窻疑月影着地似楊花四望渾同色微
茫認點鴉

用馮深居韻題蒲陽章氏環翠樓

百尺危梯眇海寰欄干十二盡青山煙光濃淡
藏多景野水周遭匝四環勝地只宜騷客住老
天未放主人閑憑誰說與九仙道方丈移來在
此間

書懷呈曾性之

覽鏡嘆頭顱梅花一樣臞病因吟後有愁到醉
邊無心事歸梁燕年華過隙駒世途難着脚况
復是江湖

和伯氏春雨中韻

癡寒脉脉壓晴莎春漸三分景未和待得濃陰
收拾後花邊春色已無多
兩堤楊柳拂新亭恠底遊人懶踏青手撚梨花
成小立半窻湖水雨冥冥

寄梅臞

別去忽經旬春風閱二分幾番吟對雨獨自暗

思君客裏加頻病愁邊駭近聞倚欄商不得心
目亂於雲

和伯氏包山觀桃花韻

因訪桃花到嶺根御林春色此平分千株未數
栽唐觀一幅猶堪畫晉源仙在雲間無處覓人
行風外有香聞笙簫隱隱宮城隔立盡黃昏更
斷魂

竹莊小集終



